



ՆԿԱՐԻՉ ԳՐԻԳՈՐ ԽԱՆՋՅԱՆԻ ՇՆՈՐՀԱՎՈՐԱԿԱՆ ԽՈՍՔԸ
ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ
ԾՆՆԴՅԱՆ 85-ԱՄՅԱԿԻ ԱՌԹԻՎ

«ԶԱստուած փնտռելու ճամբին ես գտայ Ս. Էջմիածինը ու իմ Հայրենիքը եւ խոնարհուեցի ճակատագրի առաջ: Վազգէն Ա»:

Սիրելի Վեհափառ Տեր,

Սրբ. Հայրեր, տիկնայք ու պարոնայք,

Թույլ տվեք չբաժանել Վեհափառ Հոր այս կարծիքը: Վեհափառ Տեր, Աստված ողորմած եղալ մեր հանդեպ, Զեր ժողովրդի հանդեպ. գտաւ Զեզ ու բերեց և գիտեր, որ բերում է չարչարելու, տանջելու մեր փրկության համար: Բայց Տերը գիտեր նաև, որ փոխհատույց է լինելու, որ Զեզ էր տնօրինված հրաշագործ մի աշխատանք, ինչպէս նաև բախտը՝ տեսնելու և օրհնելու հայ ժողովրդի հազարամյա երազանքը՝ ազատ ու անկախ Հայաստանի հռչակումը:

Երեսունութ տարին հազարամյակների մեջ մեծ թիվ չէ, բայց այդ ընթացքում կատարված աշխատանքը և՛ ծավալով, և՛ բովանդակությամբ կրհիշվի Մայր Աթոռ Ս. Էջմիածնի պատմության մեջ որպէս զարմանահրաշ մի ժամանակաշրջան, երբ աննախադեպ ծաղկում ունեցան մշակույթի բոլոր ասպարեզները, այդ թվում նաև՝ աշխարհը:

Մեր գնահատականը ճիշտ կընկալվի, եթե նախապէս մի փոքր անդրադառնանք այն խնդրին, թե ինչ ժառանգություն հասաւ Վեհափառ Տիրոջը, և ինչպիսին էր իրավիճակը Մայր հողի վրա և Մայր Աթոռ Ս. Էջմիածնում: Այստեղ տիրում էր անտարբեր և անբարյացակամ պետական կեցվածք, հիմնականում թելադրված կենտրոնից, բնականաւ զարգացման ճանապարհները փակ, արգելակումների և վախի մեջ՝ հազիվ լսվում էր Հայ Առաքելական Եկեղեցու զարկերակի բաբախումը:

Ամենայն Հայոց Հայրապետը ամենից առաջ պետք է գտներ և ապա փորձեր շարունակել անցյալից եկող կապերը, առանց որոնց անհնարին էր Եկեղեցու լիարժեք գործունեությունը: Մեր ժամանակներում անհրաժեշտ էր նաև նորովի գնահատել և վերականգնել այն ամենը, ինչ հավաքված էր Մայր Աթոռում հեռավոր ժամանակներից, նրանց տալով նաև գիտական արժեքավորում:

Նախկինում հայ մշակույթը հիմնականում գործել է Եկեղեցու շուրջ՝ հաղորդելով ստեղծագործություններին գործածական, կիրառական իմաստ,

ներգրավելով մեծ մասամբ ժողովրդական վարպետներին: Պրոֆեսիոնալները գործին մասնակցել են առիթից-առիթ, իսկ հայկական գաղթօջախներում պատվերները կամ կատարված նվիրատվությունները կրել են տեղի կնիքը: Եվ այս է պատճառը, որ արվեստի շատ գործեր չէ, որ ճեղքել են հոգևոր շրջանակը՝ մտնելու համար ընդհանուր մշակույթի ոլորտը:

Հաստատենք, որ Վեհափառ Տիրոջը հաջողվեց ոչ միայն իրագործել վերը նշված խնդիրները, այլ նաև կյանքի կոչել, կենդանացնել ասպարեզներ, որոնք համարվում էին կորսված կամ մեռած:

Այս 38 տարիներից 34-ում ես եղա այդ աշխատանքների մասնակիցը և ականատեսը այդ տարիներին ստեղծվեցին եկեղեցական արվեստի բազմաթիվ գործեր, որոնք մտան նաև հայ աշխարհիկ արվեստի հարստությունների մեջ:

Վեհափառ Հայրապետը ամենից առաջ ձեռնամուխ եղավ դուրս մղելու եկեղեցիներից օտար, պատահական, ցածրանշակ արվեստի գործերը՝ սկսելով Մայր տաճարից: Նրանց տեղը գրավեցին մեր դասական նկարչության հեղինակների սրբապատկերները, նոր գործված վարագույրները, խաչվառները, մոմակալներ և եկեղեցական այլ պարագաներ՝ հավատի տրեփունքներին ներարկելով հայաշունչ ոգի:


Այս գործի համար պետք եղավ պետությունից ետ ստանալ եկեղեցական նկարչության զգալի թվով գործեր, որոնք ժամանակին բռնազավթվել էին: Դրանք վերականգնման ու նորոգման աշխատանքներից հետո զետեղվեցին համապատասխան տեղերում: Այս աշխատանքները կատարվեցին Սանկտ-Պետերբուրգից հրավիրված մասնագետների կողմից:

Կցանկանալի ձեր ուշադրությունը քննել այն ասպարեզների վրա, որոնցում գործեցին պրոֆեսիոնալ արվեստագետները՝ նոր որակ հաղորդելով Մայր Աթոռի արվեստի գործերին:

Նախ թվարկենք ասպարեզները՝ հրատարակչական գործ, նկարչություն և քանդակագործություն, ոսկերչություն ու արծաթագործություն, տաք մետաղի մշակում, փայտարվեստ, գործվածքեղեն, թանգարանների բարեկարգում և հիմնադրում, հոգևոր երաժշտություն:

Այժմ կանգ առնենք այն ասպարեզների վրա, որոնք նորույթ էին մեզանում՝ շատ հնում թողած լինելով իրենց հետքը: Նախ նշենք վաղամեծիկ նկարիչ Հովհաննես Մինասյանի որմնանկարները Օջականի Ա. Մեսրոպ Մաշտոց եկեղեցում, առաջին և լուրջ, ինչպես նաև խոշոր և հաջող փորձը՝ վերականգնելու անցյալի սովանդույթը: Դրան հաջորդեց տաք մետաղի մշակման զարթոնքը: Մի արվեստ, որից մասունքներ ունեինք թանգարաններում և Հեթում թագավորի ջահը՝ պահպանված Էջմիածնում: Հրաշալի մոմակալներ՝ Մայր տաճարի և Նոր Վեհարանի համար, ջահեր, ցանցաճաղեր (արվ. Վ. Օհանյան), հայաշունչ գործեր, որոնք դարձան ելակետ, և այսօր մեր մշակույթի այդ ժանրը ապրում է լիարժեք կյանքով:

Էջմիածնում կատարվեցին առաջին և լուրջ փորձերը՝ ստեղծելու հայաոճ կահույք թե՛ եկեղեցիների ներքին հարդարանքի և թե՛ վանական շինությունների համար: Դրանցից նշենք Ա. Հռիփսիմե վանքի դռներն ու մոմավաճառի սեղանը, ապա վանքի բակում գտնվող վանատան և սեղանատան ներքին կահավորումը, ինչպես նաև Էջմիածնի Մայր տաճարի ներքին կայքը. սա զարթոնք է փայտարվեստի, որն անկասկած կունենա իր շարունակությունը և ազդեցությունը, (նկ. Գ. Խանջյանի նախագծերով, վարպետներ՝ Ռ. Տեր-Թադևոսյան և Վ. Կարապետյան): Եվ վերջապես գործվածքեղենի



Ս. ՄԵՍՐՈՊ ՄԱՇՏՈՅ

մասին: Գորգերով, ասեղնագործություններով, վարագույրներով և այլ գործերով Մայր Աթոռը հարուստ էր, սրանց ավելացավ գորելենը, այս արվեստը մեզ մոտ չի եղել. ասում են գորելենը ցուրտ կամ սառը երկրի մշակույթ է:

Արդիական գորելենի արվեստը այսօր Հայաստանում կա և զարգանում է հաջողությամբ, բայց դասականը նորույթ էր, որը իրագործվեց Վեհափառի կամքով՝ «Իջման տեսիլք», «Հայոց այբուբեն», «Վարդանանք» և «Վերածնվող Հայաստան» գործերով (նկ. Գ. Խանջյան): Այս գործերի ջերմ ընդունելությունը մեկ անգամ ևս ապացուցեց, որ Վեհափառ Հայրապետը քաջ գիտե, թե ինչ է ուզում, ինչի համար և երբ: Ես կարծում եմ, որ բոլոր արվեստագետները, որոնք աշխատակցում են Վեհափառ Տիրոջ հետ, կասեն, որ նրա հետ աշխատելը հեշտ է, քանի որ նրա իմացական աշխարհը մեծ է, միաժամանակ նաև՝ դժվար, քանզի նորից նրա իմացական աշխարհը մեծ է:

Աննախադեպ ծաղկում ապրեցին ոսկերչական և արծաթագործական ասպարեզները: Այստեղ գործեցին այնպիսի վարպետներ, ինչպիսիք են՝ Ժ. Չուլոյանը, Բ. Արզումանյանը, Լ. Բերբերյանը, Մ. Թամրազյանը: Ոչ միայն այս ժանրում, այլ նաև մյուս ժանրերում գործած վարպետների, արվեստագետների անուններն ու նրանց կատարած աշխատանքները ես չեմ թվարկելու. դրանք մանրամասն մեկնաբանված են պրոֆեսոր Վ. Հարությունյանի «Եկայք շինեսցուք» գրքում, բայց չեմ կարող մի քանի խոսք չասել Բ. Արզումանյանի և Ժ. Չուլոյանի ստեղծած գործերի, հատկապես «Հայոց այբուբենի» «Ոսկյա խաչի» մասին, որոնք դուրս եկան Մայր Աթոռի շրջանակներից և մտան մեր արվեստի գանձերի շարքը: Այս աշխատանքներում առկա են գեղագիտական հորինվածքի բարձր թոփշ և կատարողական անթերի վարպետություն: Դիտողները ոչ միայն հմայվում են վերը նշվածով, այլև նրանց զարմացնում է հայ ժողովրդի բացառիկ սերը դեպի իր այբուբենը: Իզուր չէ, որ ասվել է՝ ոսկուց ամեն բան տեսել էինք աշխարհում, բացի այբուբենից: Ժամանակը չի գերում, որպեսզի այստեղ խոսեմ բազմաթիվ եկեղեցական գավազանների, մատանիների, խաչերի, կաթսաների, աղավնիների մասին, որոնցից յուրաքանչյուրը արվեստի ուշագրավ երևույթ է և գալիս է լրացնելու այդ ժանրի արժեքների հավաքածուն:

Հրատարակչական գործունեությունը, որը միշտ եղել է Սուրբ Էջմիածնի ուշադրության կենտրոնում, Վեհափառի օրոք մի նոր թափ և որակ ստացավ. եղան հրաշալի լույսընծայումներ, որոնցից միայն երկուսը կնշեմ՝ «Խաչքարերը» (հեղ. Լ. Ազարյան) և «Էջմիածնի գանձերը»: «Խաչքարեր» գիրքը առաջին փորձն էր կազմելու ընտրված և ի մի բերված խաչքարերի մի ալբոմ՝ համատեղ տեսնելու համար հայ մշակույթի եզակի այդ կոթողները: Դա հնարավորություն էր տալիս մասնագետներին թե՛ հայ և թե՛ օտար, լայնորեն ծանոթանալու և գնահատելու քանդակագործական արվեստի այդ յուրահատուկ ստեղծագործությունները: Իսկ «Էջմիածնի գանձերը» ոչ միայն գրքային արվեստի նվաճում էր, այլ նաև մեծ ու փառավոր տարածումը հայ եկեղեցական արվեստի սքանչելի ստեղծագործությունների: Ծանոթ էր թերևս գիտեն, որ Լիսաբոնի Կյուլպենկյան հաստատությունը 100 համարակալված օրինակ պատվիրեց այդ գրքից և տարածեց աշխարհի կարևոր մշակութային կենտրոններում՝ այդպիսով այն սեփականությունը դարձնելով աշխարհի արվեստասեր հասարակայնության:

Եվ, վերջապես, թանգարանային վերանորոգման և հիմնադրման դրժվարին ասպարեզը, որը վեր է ամեն գնահատականից: Այդ մասին հանգա-

մանորեն կխոսի արվեստաբան Մանյա Ղազարյանը, բայց ես չեմ կարող չառել, որ այս կարևոր գործը կատարյալ դարձրեց եկեղեցական արվեստի հայաշունչ դեմքը՝ այցելուներին գերելով հայ ժողովրդի բազմաշնորհ ունակություններով և նրա հոգու գեղեցկությամբ:

Անգնահատելի է Ամենայն Հայոց Հայրապետի վաստակը: Նա իր գահակալության 38 տարիների ընթացքում հայրենիք վերադարձրեց արվեստի բազմաթիվ գործեր՝ նկարներ, գործվածքներ, քանդակներ, ձեռագրեր, նշանավոր հայ գործիչների արխիվներ: Ականատես եմ եղել, թե ինչպիսի զգայուն վերաբերմունք էր ցուցաբերում Հայրապետը յուրաքանչյուր գործի նըկատմամբ, ինչպիսի անհանգստություն էր ապրում, մինչև որ այն կարողանում էր հասցնել հասցեատիրոջը: Այդ գործերի թվում են եղել Այվազովսկու, Լևիտսկյանի, Մահտեսյանի, Ալխազյանի և այլոց գեղանկարները, ինչպես նաև Թորոս Ռոսլինի և անանուն գրիչների ու մանրանկարիչների ձեռագրեր:

Այս ամենը արվել է 38 տարիների ընթացքում, հսկողության և երկյուղի զգացողության տակ, բայց պետք է ազնիվ լինել և ասել, որ Վեհափառի և ոչ մի ձեռնարկում և ցանկություն չի մերժվել տոտալիտար հասարակարգի հայ ղեկավարների կողմից: Սակայն դա չէր խանգարում, որ կենտրոնից եկած շրջաբերականներով հաճախ խափանվեի կամ արգելվեի այս կամ այն գործը: Կատարվել է մեծ աշխատանք՝ շնորհիվ Հայոց Հայրապետի իմացության, իմաստության, նվիրումի, անխախտ հավատի և անձնական հմայքի:

Սիրելի Վեհափառ Տեր, թույլ տվեք նվաստիս վերջացնել ասելիքս Աստվածորդու՝ Քրիստոսի հետևյալ խոսքերով—«Ես չառացի, որ դուք չեք չարչարվի, ես չառացի, որ դուք չեք տանջվի, այլ ես ասացի, որ դուք կհաղթեք»:

Վեհափառ Տեր, Դուք հաղթեցիք և դեռ պիտի հաղթեք:

Աստված թող Ձեզ պահի և պահպանի Մայր Աթոռի և հայ ժողովրդի համար:

